

玉函山房輯佚書

目新帖卷九

歷城馬國翰竹吾甫

書三

書序啓與有扈戰于甘之野作甘誓竹書紀年帝啓  
二年王帥師伐有扈大戰于甘淮南子齊俗訓有  
扈氏爲義而亡知義而不知宜也高誘註有扈啓  
之庶兄也以堯舜與賢禹獨與子故伐啓啓亡之  
世本亦云扈爲啓之庶兄是伐有扈爲夏啓事明  
矣而劉向說苑理政篇子貢曰禹與有扈氏戰三

陳而不服禹於是修教一年而有扈氏請服莊子  
人間世禹攻有扈國爲虛厲墨子明鬼篇夏書西  
誓曰大戰于甘呂氏春秋召類篇禹攻曹魏屈盤  
有扈以行其教此皆以爲禹事呂氏春秋先己篇  
又云夏后相與有扈戰于甘澤而不勝六卿請復  
之夏后相曰不可吾地不淺吾民不寡戰而不勝  
是吾德薄而教不善也於是乎處不重席食不貳  
味琴瑟不張鐘鼓不修子女不飭親親長長尊賢  
使能期年而有扈氏服此又以爲夏后相事又楚

辭天問該乘季德厥父是臧胡終斃于有扈牧夫  
牛羊又云有扈牧豎云何而逢擊牀先出其命何  
從又似伐有扈爲少康事蔡邕銘論殷湯有甘誓  
之勒則又誤以爲湯事考太平御覽卷八十二帝  
啓事中引呂氏春秋作夏后伯啓伯字古多作柏  
南宋後本遂誤爲柏其他以爲禹事者禹時有扈  
氏叛禹滅之故以封其庶子至啓時復據有扈以  
叛故啓有甘之戰也陳本禮屈詞精義該朱子謂  
是啓字有扈王逸注澆國名當時大戰於甘有扈

雖滅而其怙強稔惡之衆如澆者固未盡殄也及  
太康尸位餘孽一時同逞所以卒遭羿澆之禍蓋  
兵端由於伐扈以致后緡歸於有仍爲牧正是終  
弊於有扈氏也又云少康官於有仍爲牧正而云  
有扈者蓋是時少康使艾謀澆不敢顯言有仍故  
託名有扈潛蹤而出與女艾擊澆也說極深至可  
以翼經

咸侮五行怠棄三正孔傳五行之德王者相承所取  
法又云怠情棄廢天地人之正道言亂常釋文引

馬云建子建丑建寅三正也史記集解引鄭元曰  
五行四時盛德所行之政也威武暴逆之三正天  
地人之正道鄭孔義同蔡傳三正川馬說似不及  
鄭孔義也

墨子引甘誓曰今予與有扈氏爭一日之命且爾卿  
大夫庶人予非爾田野葆土之欲也予恭行天之  
罰也與今書殊異

段氏撰異夏書甘誓天用剿絕其命天寶以前本如  
是釋文曰剡子六反玉篇子小反馬本作剡開寶

以前如是今玉篇剡子小反剡同上此顧希馮之  
舊也自衛包改剡爲勦以刀部訓絕之字改爲力  
部訓勞之字於是五經文字力部曰勦見禮記又  
見夏書而刀部反無剡字開寶中改釋文剡爲勦  
剡爲巢羣經音辨集韻等云勦絕也重紕地繆莫  
能說正

御纂尚書傳說彙纂義作剡乃復古本之舊云

予則孥戮汝孔傳謂辱及汝子漢書王莽傳作勿顏  
師古注謂戮之以爲奴也王伯厚取之又引泰誓

囚奴正士以證及子之非案顏師古匡謬正俗

古文商書湯斲古誓字云予則孥戮汝孔安國傳云

古之用刑父子兄弟罪不相及今云孥戮權以脅之使勿犯也案孥戮者或以爲奴或加刑戮無有所赦耳此非孥子之孥猶周書秦誓稱囚孥正士亦謂或囚或孥也豈得復言並子俱囚也又班固漢書季布傳負云及至困亢奴僇苟活蓋引商書之言以爲折衷矣

春秋左傳夏有觀扈國語楚語士亶曰堯有丹朱舜



有商均啓有五觀湯有太甲文王有管蔡是五王者皆元德也而有姦子韋昭解五觀啓于太康昆弟也竹書紀年帝啓十年放季子武觀於西河沈約注武觀卽楚語五觀也韓非子說疑篇引記與國語同王符潛夫論五德志啓子太康仲康更立兄弟五人皆有昏德不堪帝事降頌洛汭是謂五觀盟子非樂篇引武觀逸周書晉麥解殷當作夏之五子忌伯禹之命假國無正用胥興作亂遂凶厥國楚辭離騷夏康娛以自縱不顧難以圖後兮五

子用失乎家衡左國及周秦漢魏諸儒說五子皆如此鄒道元水經注亦云太康弟曰五觀王應麟困學紀聞謂五子述大禹之戒以作歌仁義之人其言藹如也豈朱均管蔡之比韋氏說非也全氏祖望箋又引後漢郡國志衛公國本觀故國姚姓據以爲畔觀非夏之宗室而況以爲太康之母弟乎足助伯厚之辯但啓有五觀傳文甚明意者觀國有二一爲舜後一爲五觀封如南燕姑姓北燕姬姓之類乎

有窮后羿正義引賈逵云羿帝嚳射官林之奇尙書  
全解據先儒之意謂凡善射者皆謂之羿此有窮  
之君亦善射故以羿目之非是名也孟子謂逢蒙  
殺羿別是一羿非有窮之羿也有窮之羿爲寒浞  
所殺非見殺於逢蒙以是知羿是善射者之稱案  
淮南子堯時十日並出草木枯焦命羿仰射中其  
九日日中鳥盡死楚辭天問羿焉彈日指此事此  
賈逵所謂羿帝嚳射官者也有窮偃姓之君好田  
左臂修而善射慕古羿之名故亦名羿故曰有窮

后羿非他人以羿目之也楚辭天問帝降夷羿革孽夏氏胡歟夫河伯而妻彼雒濱王逸注傳曰河伯化爲白龍遊於水旁羿見歟之眇其左目河伯上訴天帝曰爲我殺羿天帝曰爾何故得見歟河伯曰我時化爲白龍出游天帝曰使汝深守神靈羿何從得犯汝今爲蟲獸當爲人所歟固其宜也羿何罪歟羿又夢與洛水神宓妃交接也古歸藏張衡靈憲李淳風乙巳占並云羿請無死之藥於西王母姮娥竊之以奔月將往枚筮之於有黃有

黃筮之曰吉翩翩歸妹獨將西行逢天晦芒母驚  
母恐後其大昌姮娥遂託身於月爲蟾蜍又三餘  
帖嫦娥奔月之後羿盡夜思維成疾正月十四夜  
忽有童詣宮求見曰臣夫人之使夫人知君懷思  
無從得見明日乃月圓之候君宜用米粉作丸團  
團如月置室西北呼夫人之名三夕可降如期果  
降復爲夫婦如初語皆涉於荒誕然非無因考路  
史浞寒君伯明之讎子弟羿篡夏自立任以爲相  
浞烝娶羿妻嫦娥小字純狐內媚外賂娛羿於咬

與逢蒙共謀殺羿此宿是羿妻亡室與寒浞淫奔  
詭託神仙而羿信之遂以爲天降符瑞之事飾智  
驚愚後人不察遂謬傳如此也竹書紀年謂太康  
被羿廢逐居斟鄩四年陟路史以爲廢逐之後世  
莫知其死案天問馮珖利決封豨是孰何獻蒸肉  
之膏而后帝不若陳本禮屈辭精義不若者似羿  
行操莽之計於冬祭日獻鵠肉而弑帝也后帝指  
太康此事亦構机造聞得天問傳之可補古史之  
闕王逸注謂天帝羿獵射封豨以其肉膏而祭天

誤也其說堪與尙書參考又虞汝明古琴疏帝相  
元年條谷貢桐芍藥帝命羿植桐於雲和命武羅  
伯植芍藥於後苑武羅諫曰帝方崇德怪草奇木  
懼遷厥嗜宜食駕車之良馬帝不從於是作誼諫  
羿乃伐桐爲琴以進帝帝善之名曰條谷帝稍遷  
於音樂不聽政爲羿所逐居於商邱援琴作源水  
之歌曰涓涓源水不涸不塞穀旣破碎庸大其輻  
事以敗矣乃重太息又芸窓私志后羿獵於巴山  
獲一兔大如驢異之置樞中中途失去樞掩如故

羿夜夢一人冠服如王者謂羿曰我殂扶君爲此  
土之神而何辱我我將假手於逢蒙是日逢蒙弑  
羿而奪之位二事皆罕見引用附載於此

春秋左傳哀六年引夏書曰惟彼陶唐帥彼天常有  
此冀方今失其行亂其紀綱乃滅而亡與今書小  
異丹鉛總錄謂古文術從行中人又音道石鼓文  
我水既靜我術旣平五子之歌以術叶方音平音  
道路之行如景行字作術人之雁行足行當作斯  
見龜策傳



目耕帖

卷九

八歸經補校

東坡書傳謂義和貳於羿忠於夏者故羿假仲康之命命胤侯征之集傳非之以爲今案篇首言仲康肇位四海胤侯承王命徂征詳其文意蓋史臣善仲康能命將遣師胤侯能承命致討未見貶仲康不能制命而罪胤侯之爲專征也若果爲篡羿之書則亂臣賊子所爲孔子亦取之爲後世法乎論極正大然蘇說亦非臆撰金履祥通鑑前編左傳所載伯封之事似失之誣路史曰禹命伯封叔及昭明作衍歷歲紀甲寅敬授人時則伯封夏之天

官仲康征羲和而夷羿滅伯封是與王室爭諸侯  
耳東坡論略與此同第金氏謂左傳失誣殊非也  
案伯封爲樂正后夔之子古者律歷事本相通度  
當禹之代后夔以樂正兼羲和而封於歸夔沒之  
後禹命伯封就國世掌其官歲紀甲寅敬授人時  
此其策命之辭也左傳謂伯封貪汙忿類實有豕  
心后羿滅之觀左氏稱伯封之惡與肩征所謂顛  
覆厥德沈亂于酒畔官離次倣擾天紀相吻合當  
是伯封之國之後墮其世德尸官干誅仲康命肩

侯數其罪而討之羿於斯時逞其強橫善射之能  
乘閒而起與王爭雄耿伯封於桑林而滅之故楚  
辭天問云馮珖利決封豨是耿也綜考古籍揆以  
情勢當年時事度必如此斯蘇氏金氏之說不爲  
無稽而集傳亦可相通矣至林之奇全解謂羲和  
黨惡於羿肩侯承王命往征之以翦羽翼此則懸  
揣之辭於古無據也

顧炎武曰知錄羲和尸官襲天也允征之葛伯不祀  
忘祖也湯征之王者尊祖敬天卽王制削黜諸侯

必先不敬不孝之義說極正大

大衍歷議新歷仲康五年癸巳歲九月庚戌朔日蝕  
在辰二度案邵子皇極經世仲康元年壬戌紀義  
和五年丙寅與歷不同閻氏若璩尙書古文疏證  
以授時時憲二歷推算仲康卽位歲在壬戌乃五  
月丁亥朔日蝕非季秋月朔蝕在東井亦非房宿  
在位十三年中惟四年九月壬辰朔日有蝕之却  
與經文肇位四海不合且蝕在氏末度亦非房宿  
總之此出魏晉間晚出書肩征篇翰案竹書紀年

太康被弑逐居斟鄩四年陟是仲康攝位四年而  
太康始沒故四年始稱肇位氏宿未度已交房之  
初度故經言辰弗集于房以此考之經歷未嘗不  
合也

古三墳地皇軒轅氏政典先時者殺不及者殺與尙  
書所引政典略同案三墳書晁公武郡齋讀書志  
以爲張天覺得之於比陽民家陳振孫直齋書錄  
解題以爲元豐中毛漸正中奉使京西得之唐州  
民馬貴與羅泌皆疑其僞惟鄭樵信之此書真贋

不可知然其文古質有可取者

逸周書載湯誓衆之辭曰陰勝陽卽謂之變而天弗施雖勝雄卽謂之亂而人弗行故諸侯之治政在諸侯之大夫治於從此不知出於何篇疑湯征之佚文也

論語予小子履一節孔安國注墨子引湯誓其辭若此邢昺疏尙書無此文而湯誓有之又與此小異國語周語內史過引湯誓曰予一人有罪無以萬夫萬夫有罪在予一人韋昭解今湯誓無此則已

佚亡矣而今書湯誥有此文曰其爾萬方有罪在  
予一人予一人有罪無以爾萬方又復不同史記  
殷本紀載湯誓全篇亦與今書字句小有同異今  
載之以備參考湯曰格汝眾庶來汝悉聽朕言匪  
台小子敢行舉亂有夏多罪予維聞汝眾言夏氏  
有罪予畏上帝不敢不正今夏多罪天命殛之今  
汝有眾汝曰我君不恤我眾舍我舊事而割政夏  
汝其曰有罪其奈何夏王率止眾力率奪夏國有  
眾率怠不和曰是日何時喪予與汝皆亡夏德若

茲今朕必往爾尚及予一人致天之罰予其大理  
汝汝毋不信朕不食言汝不從誓言予則帑僇汝  
無有攸救

郝敬尙書原解甘誓以君討臣其氣直而壯湯誓以  
臣伐君其詞正而婉

仲虺史記作中翬大戴禮記作仲傀荀子作中謁孟  
子伊尹萊朱趙岐注伊尹摯也萊朱亦湯賢臣也  
一曰仲虺是也春秋傳曰仲虺居薛爲湯左相是  
則伊尹爲右相故二人等德也唐書宰相世表云



仲虺爲湯左相臣虺祖已皆其胄裔也綜考諸說  
蓋萊姓朱名仲虺其字也

墨子引仲虺之語曰我聞有夏人矯天命布命于下  
帝式是惡用爽厥師與今書仲虺之語又巽又左  
傳襄十四年中行獻子引仲虺有言云亡者侮之  
亂者取之推亡固存國之道也又襄三十年子皮  
引仲虺之志曰亂者取之亡者侮之推亡固存國  
之利也文亦小異

呂氏春秋驕恣篇吳起述楚莊王語仲虺有言曰諸

侯之德能自取師者王能自取友者存其所擇而  
莫如已者亡荀子說問篇作仲歸之言云諸侯自  
爲得師者王得友者霸得疑者存自爲謀而莫若  
已者亡又吳子圖國篇楚莊王曰寡人聞之能得  
其師者王能得其友者霸以呂覽荀子證之亦卽  
約仲虺之言三書文小異而要與今書不同

黃宣猷說放之名同而義異舜於驩兜曰放者流竄  
之也封象曰放者不及以政也伊尹於太甲序稱  
放者不知朝政使之密邇祖訓也湯伐桀不曰伐

而曰放者君臣之分不可廢也

困學紀聞言仁始於虺誥言性始於湯誥言誠始於  
太甲言學始於說命皆在商書孔子殷人也所學  
皆家學也聽潮居存業本此說以爲孔子學問原  
於契及成湯武丁似未若王說之圓活

史記殷本紀既緡夏命還亳作湯誥維三月王自至  
於東郊告諸侯羣后母不有功於民勤力迺事予  
乃大罰殛女母予怨曰古禹臯陶久勞于外其有  
功乎民民乃有安東爲江北爲濟西爲河南爲淮

因濟已修萬民乃有居后稷降播農殖百穀三公  
咸有功於民故后有立昔蚩尤與其大夫作亂百  
姓帝乃弗予有狀先王言不可不勉曰不道母之  
在國女母我怨以令諸侯今書湯誥無此文觀誥  
中論民居引先王言與書序所謂從先王居意合  
或者帝告之逸文太史公參錄於此以帝告爲湯  
所作故又稱湯誥乎

天命不僭釋文僭子念反忒也劉戡林反劉卽正義  
所引二劉焯及炘也案詩小雅鼓鐘篇以雅以南

以籥不僭僭與南叶則劉音微林反亦古音也

今書伊訓之文與諸書所引外異特多孟子引伊訓

曰天誅造攻自牧宮朕載自亳今書作造攻自鳴

條朕哉自亳荀子引書曰從命而不拂微諫而不

倦爲上則明爲下則遜楊倞注書伊訓也今書作

從諫弗拂先民時若爲上克明爲下克忠墨子引

云嗚呼古者有夏方未有禍之時百獸貞蟲允及

飛鳥莫不比方矧伊住

伊字

人面何敢異心山川鬼

神亦莫敢不寧又云其桓舞于宮是謂巫風其刑

君子出分一二衛小人不一又云乃言曰嗚呼舞

洋洋黃

當是

言孔章上帝弗常九有以亡上帝不

順降之百殃其家必懷喪漢書律歷志劉歆三統

歷引伊訓曰惟太甲元年十有二月乙丑朔伊尹

祀于先王誕資有牧方明朱子曰方當作乃卽所

謂乃明言烈祖之成德案竹書紀年太甲十年大

饗于太廟初祀方明儀禮覲禮諸侯覲于天子爲

宮方三百步四門壇十有二等深四尺加方明于

其上鄭元注方明者上下四方神明之象所謂明

神也三禮圖方明木方四尺設六色東青西白南  
赤北黑上元下黃設六玉上圭下璧南方瑋西方  
琥北方璜東方圭方明者上下四方之神明天之  
司盟用槐爲之據此則方明蓋商家一代禘祭之  
大典非乃明之誤也正義鄭注典寶引伊訓曰載  
孚于廟又曰征是三股今書並無之孔氏正義以  
伊訓爲張霸僞作又以劉歆鄭元之徒誤信爲真  
古文亦疏家偏祖之見也

伊訓曰惟元祀十有二月乙丑太甲甲曰惟三祀十

有二月朔皆用十有二月東坡書解正月謂之十  
二月何也殷正月夏之十二月殷雖以建丑爲正  
猶以夏正數月亦猶周公作豳風而云七月流火  
九月授衣皆夏正也兩山墨譟唐子西曰學者皆  
謂夏以建寅爲正周以建子爲正然商居其間不  
應無所變改因以意推之曰商以建丑爲正而三  
統之說興焉夫夏以建寅爲正吾於論語見之矣  
曰行夏之時周以建子爲正吾於春秋見之矣曰  
十月隕霜殺菽三月大水至商人以建丑爲正於



經則無所見夫以建子爲正者取四時之首也以  
建丑爲正其取義安在哉案唐氏之說如此其自  
信可謂勇矣然獨惜其考之殊未審也商書伊訓  
之首曰惟元祀十有二月乙丑伊尹祀于先王奉  
鬯王祗見厥祖侯甸羣后咸在百官總己以聽冢  
宰大甲之篇曰惟三祀十有二月朔伊尹以冕服  
奉鬯王歸于亳夫前乎此伊尹攝祀總朝以十有  
二月乙丑後乎此太甲反吉卽政以十有二月之  
朔蓋商以建丑爲正故皆以十二月舉大事先儒

劉敞七經小傳墨叔向所謂夏書昏墨賊殺臯陶之  
刑會以敗官爲墨集傳取之案杜預左傳注墨不  
潔之稱庸臣容悅以貪位與汚吏竢斂以貪財其  
心一也故同以墨加之國學紀聞制官刑則具訓  
蒙士舞德彝則誥教小子謹始之義也

目耕帖

卷九

也衡平也言依倚而取平書曰惟嗣王弗惠于阿  
衡亦曰保衡皆伊尹之官號非名也案阿倚衡平  
之說本鄭詩箋蔡傳用之或曰阿衡伊尹之號案  
唐虞夏后曰百揆商曰阿衡周曰冢宰皆上相之  
稱阿衡亦曰保衡者皇甫謐帝王世紀太甲反位  
又不怨故更尊伊尹曰保衡而鵠冠子云伊尹酒  
保立爲世師則因割烹傳會而訛未足究詰也

顧諟天之明命孔傳諟是也說文諟理也从言是聲  
鄭氏禮記大學注諟正也陳書姚察傳尤好諟正

文字亦用鄭訓。西山云：惟湯顧天之明命，天亦監湯之厥德。曰：顧曰監，天人之交近而非遠也。陳際泰五經讀不顯者，湯也。文王接其統，待旦者，湯也。周公繼其傳。

書曰：營于桐宮。又曰：王徂桐宮，居憂。曰：營曰徂，非放明矣。戰國處士創爲伊尹放太甲之說，孟子略迹原心，以爲有伊尹之志，則可；無伊尹之志，則篡也。夫伊尹之志，志在格君心之非而已。迨王終允德，冕服奉歸，此志始曉然於天下。故孟子諒其心而

可之要未嘗實指其有放君之事也孔叢子執節篇趙孝成王問曰昔伊尹爲臣而放其君其君不怨何行而得乎此也子順答曰伊尹執人臣之節而弼其君以禮亦得此道而已矣王曰方以放君爲名而先生稱禮何也子順曰以禮括其君使入於善也曰其說可得聞乎答曰其在商書太甲嗣立而于冢宰之政伊尹曰惟王舊行不義習與性成予不狎于不順王始卽桐廬于先王其訓罔以後人迷王徂居憂允思厥祖之明德是言太甲在

喪不明乎人子之道而欲知政伊尹使之居桐近  
湯之墓憂喪之地放之不俾知政三年服竟然後  
反之卽以奉禮執節事太甲者也卒其君以義強  
其君以孝道未有行此見怨也王曰善哉我未之  
聞也此論與孟子相發元聖之心昭然若發矇矣  
東萊書說南巢言放不言伐者所以維君臣之統於  
萬年桐宮言營不言放者所以存君臣之分於奕  
世徂桐曰居憂樂則心放憂則心收也

禮記緇衣引尹吉曰惟尹躬及湯咸有壹德鄭注吉

讀告古文告字之誤伊尹之誥也書序以爲咸有  
壹德緇衣又引尹吉曰惟尹躬天見于西邑夏自  
周有終相亦惟終文在今書太甲天作先文字小  
異又引太甲曰無越厥命以自覆也若虞機張往  
省括于度則釋案緇衣爲公孫尼子所作漢志以  
公孫尼子爲七十子之弟子必及見孔子所訂之  
書今書列異如此宜梅閣諸儒力攻其僞也

陳櫟集傳纂疏善則稱君禮也今日尹躬暨湯則臣  
先於君曰咸有一德則臣儕於君何也尹爲聖之

任湯學焉而後臣齊聖之湯與元聖之尹豈有形迹之嫌哉

王樵尚書日記盤銘之義仲虺發之德日新慎終惟始是也盤銘之藹伊尹傳之時日新終始惟一是也虺詔曰王懋昭大德卽日新也而欽崇天道必申之以惟其始無自滿慎厥終知湯之銘有自來矣太甲篇曰王昧爽丕顯亦日新也而率祖攸行必戒之以克厥初無豫怠圖厥終知湯之銘有自遠矣



董鼎集錄纂注危微精一四言所以開知行之端主  
善協一四言所以示博約之義

七世之廟可以觀德正義王制云天子七廟三昭三  
穆與太祖之廟而七又引鄭元王制注云此周制  
七者太祖及文王武王二祫與親廟四太祖后稷  
也殷則六廟契及湯與二昭二穆夏則五廟無太  
祖禹與二昭二穆而已以爲良由不見古文故爲  
此謬說而呂氏春秋論大篇引商書曰五世之廟  
可以觀怪萬夫之長可以生謀作五世與今書及

鄭說又皆不合觀德作觀怪觀政作生謀亦異高  
誘注逸書喻山大水大生大物廟者鬼神之所在  
五世久遠故於其所觀魅物之怪異長大也大故  
可以成奇謀也案怪訓魅物非是蓋古宗廟中陳  
設靈物繪畫奇神故孔子入周太廟見金人三緘  
其口而銘其背楚宗廟壁上繪古來神異之事以  
垂戒屈原呵而問之因作天問是也故曰五世之  
廟可以觀怪梅賾之徒見怪字與經文不類因改  
爲德見天子七廟之文因改五爲七並下作謀亦

改爲觀政而入於戚有一德篇豈知呂覽是其藍  
本也

書序沃丁既葬伊尹于亳咎單遂訓伊尹事作沃丁  
孔傳沃丁太甲子伊尹既致仕老終以三公禮葬  
史記殷本紀帝沃丁之時伊尹卒既葬伊尹於亳  
咎單遂訓伊尹事作沃丁與書序合正義引皇甫  
謐云沃丁八年伊尹卒卒年百有餘歲大霧三日  
沃丁葬之以天子之禮葬祀以太牢以報大德晉  
文請隧襄王不許沃丁不當以天子之禮葬伊尹

也孔言三公禮葬未必有文要情事當然也伊尹卒於沃丁之世經傳具有明徵乃杜預後序謂竹書紀年稱殷仲壬卽位居亳命卿士伊尹仲壬崩伊尹放太甲於桐乃自立也伊尹卽於太甲七年太甲潛出自桐殺伊尹妄說不經蓋戰國時處士橫議而紀事者誤信之也

誓序伊陟相大戊亳有解桑穀共生於朝伊陟贊於巫咸作咸乂四篇呂氏春秋制樂篇故成湯之時有穀生於庭昏而生皆一而大拱高誘注誓序伊

陟相太戊毫有桑殺群共生於朝太戊太甲之孫  
太庚之子也號爲中宗又云湯生仲丁仲丁生太  
甲太甲生太庚太庚生太戊凡五君矣此云湯之  
時不亦謬乎案尙書大傳家語五儀篇韓詩外傳  
漢書五行志劉向說苑敬慎篇王充論衡異虛篇  
並作太戊事可證呂覽之誤

盤庚周禮司勳注引作般庚用今文尙書也漢石經  
殘碑盤庚下篇首句正作般字釋文盤庚殷王名  
也馬云祖乙曾孫祖丁之子不言盤庚誥何非但

錄其辭也取其徒而立功故以盤庚名篇史記殷  
本紀帝盤庚崩弟小辛立是爲帝小辛帝小辛立  
殷復衰百姓思盤庚迺作盤庚三篇案隱尙書盤  
庚將治亳殷民咨胥怨作盤庚此以盤庚崩弟小  
辛立百姓思之乃作盤庚由不見古文也案盤庚  
古文尙書本有之特篇數分合不同史記載盤庚  
乃告諭諸侯大臣曰昔高后成湯與爾之先祖俱  
定天下法則可修舍而弗勉何以成德彙括書文  
亦合其云書作於小辛之世太史公從孔安國問

如此說如堯典敘堯言事成於虞史正其類例小司馬以史遷不見古文恐未然

黃之雋唐堂續集有盤庚不改國號論辨證極確今錄其略盤庚遷殷而史謂改國號曰殷者非也堯封契於商歷五百餘年至湯以爲有天下之號又三百六十餘祀至盤庚賢聖之君一旦舉國號而革之有是理乎自司馬遷作殷本紀改爲殷契漢儒始有盤庚改殷之說當以詩書斷之商書盤庚三篇但數稱新邑並不稱殷唯上篇盤庚遷于殷

敘地之文孔安國傳云殷亳之別名書序言盤庚  
將治亳殷蓋湯舊都後王因河決屢遷而盤庚復  
從先王居若改號則蓋遂改號爲亳尙存不忘先  
王之意乃舉亳別名爲號以自絕於商耶中篇殷  
降大虐爾雅殷中也承古我前后言孔傳作殷家  
解蔡沈註不取蓋時未至殷烏得遽稱殷且既遷  
則莫厥居曷云降虐下篇作於既遷之後亦不言  
殷三傳至武丁作說命尙曰有商及高宗彤日俱  
不言殷唯祀高宗樂生商宅殷士連說一指代一



指地商先后殷受命殷武商邑互見一詩申培詩  
說謂作於帝乙之世宋世家謂襄公時追美而作  
後人雖駁其誤然必遷殷之後已闕二百餘祀臣  
民習稱其都邑云猶戰國魏都梁稱梁王韓都鄭  
稱鄭王人稱之耳國仍魏韓也至紂時見於書者  
西伯戡黎微子篇始有殷命殷邦殷民之語是時  
天下歸心文王但知有周忘其爲商故但稱殷紂  
而其臣亦自稱殷耳國仍商也尙書必曰商書不  
曰殷書父師亦曰商今其有災商其淪喪詩必曰

商頌不曰殷頌是國號不改也又曰殷商云者猶  
言蜀漢昭烈國號漢而都蜀陳壽志三國遂就所  
都稱蜀後世詩文因稱蜀主蜀相蜀將軍而出師  
表固曰漢室楊戲作武侯五十四人贊固曰季漢  
輔臣雖昭烈崛起偏安實不改國號爲蜀也而謂  
盤庚世有天下而爲之乎此義前人未發

鄭康成云祖乙居耿後奢侈踰禮土地迫近山川嘗  
圯焉至陽甲立盤庚爲之臣乃謀徙居湯舊都上  
篇是盤庚爲臣時事中篇下篇是盤庚爲君時事

正義以爲誤妄吳械書裨傳鄭大儒必有所據而  
言又荀悅申鑒時事篇盤庚遷殷革奢卽約化而  
裁之與時消息衆寡盈虛不常厥道其言亦必有  
所據

于今五邦焉融云謂商邱亳邠相耿也案書序自契  
至湯八遷羅泌路史八遷可考者六契居番昭明  
居砥石復遷於商相土遷商邱上甲居鄴湯居亳  
自湯至盤庚五遷湯遷亳仲丁遷囂河亶甲遷相  
祖乙遷耿盤庚遷殷前之八遷以湯終後之八遷

以湯始班氏云殷人屢遷前八後五其實已十二也路史說較馬爲勝史記集解引鄭元曰治於亳之殷地商家自此徙而改號曰殷亳世言商之號殷自盤庚始者誤由於此

說文𣎵木生條也从弓象枝葉華函之形由聲引商書若顛木之有𣎵枿徐鍇曰謂已倒之木更生孫枝也今書作由葉案說文櫨古文不葉枿重文訓伐餘木也馬融本作枿云顛木而肄生曰枿枿葉古通用孔傳訓由爲用殊失古文之義

目耕帖

卷九

白虎通號篇引書曰裕汝眾格作裕又引書曰不施  
予一人惕作施漢書成帝紀陽朔四年詔引書服  
田力耆穡作耆魏志裴松之注引書墮農自安情  
作墮漢書王嘉傳引書用德章厥善彰作章皆用  
今文尙書也

說文頁部顓字注引商書率顓眾戚感作戚言部譌  
字引商書王誥告之播作譌之字絕句心部憇字  
引商書今汝憇憇聒作憇火部烱字引商書予亦  
烱謀拙作烱又心部懸字引商書相時懸民愴作

想並真漆書古文字知後人隸寫轉失本文者多矣

周禮夏官司燿鄭注謂讀如予若觀火之觀今燕俗名湯熱爲觀則燿火謂熱火與賈疏申之曰予若觀火者盤庚告其羣臣不欲徙而匿情者予若觀熱也我有刑罰如熱火可畏案孔傳以觀爲視云我觀汝情如視火不如鄭義承上惕字有深致

不昏作勞正義鄭元讀昏爲昏訓爲勉也釋文昏本或作昏音敏盧召弓攷證鄭作昏讀昏昏勉也今

書亦並作昏而說文昏字从日氏省云氏者下也  
一曰民聲又𡗗字从支昏聲冒也引書昏不畏死  
陳氏樹華云說文从昏之字不一𡗗字注云𡗗或  
从昏以昏時出也今說文云云乃徐鉉之誤然則  
此昏字當由唐人避諱所改五經文字中凡從民  
之字俱作氏是其證

左傳莊十四年引商書曰惡之易也如火之燎于原  
不可嚮邇其猶可撲滅今書無惡之易也四字是  
左氏引伸若字之意非經本文

茲予大享于先王爾祖其從與享之孔傳古者天子  
錄功臣配於廟大享烝嘗也正義若烝嘗對禘祫  
則禘祫爲大烝嘗爲小若四時自相對則烝嘗爲  
大禘祫爲小以秋冬物成可薦者衆故烝嘗爲大  
春夏物未成可薦者少故禘祫爲小也知烝嘗有  
功臣與祭者案周禮司勳云凡有功者銘書於王  
之大常祭於大烝司勳詔之是也嘗是烝之類而  
傳以嘗配之魯頌曰秋而載嘗是也祭統云內祭  
則大嘗禘是也外祭則郊社是也翰案詩商頌長



發序云大禘也詩中有實維阿衡實左右先王之語然則大禘以功臣配享商之制也正義引周禮大雩兼引魯頌載嘗以解傳又謂近代已來惟禘祫乃祭功臣配食時祭不及之也亦以孔說爲疑何不據商頌大禘以正之乎又案孔叢子書曰茲予大享于先王爾祖其從予享之季桓子問曰此何謂也孔子曰古之王者臣有大功則必祀之於廟所以殊有績勩忠勤也盤庚舉其事以屬其臣故稱焉桓子曰天子之臣有大功者則旣然矣若

諸侯之臣有大功者可以如之乎孔子曰勞能定國功加於民大臣死難雖食之公廟可也桓子曰其位次如何孔子曰天子諸侯之臣生則有列於朝死則有位於廟其序一也此則合諸侯之臣言之見功臣配享之爲達禮也

國語周語內史過引般庚曰國之滅則維汝衆國之不滅則維余一人是有逸罰與今書文小異

度乃口釋文度徐如字亦作渡案渡乃口不知當何解或取利濟義然不如度訓法度爲順黃氏曰抄

畢命云商俗靡靡利口惟賢然則商人口之不度  
由來久矣

錢時融堂書解篇中兩言今予將試以汝遷安定厥  
邦舉政體也永建乃家恤私情也

左太冲魏都賦優賢著於揚歷張載注尙書盤庚曰  
優賢揚歷歷試也魏志管寧傳太僕陶邱一等薦  
寧曰優賢揚歷垂聲千載裴松之注今文尙書曰  
優賢揚歷謂揚其所歷試漢咸陽令唐扶頌優賢  
麗歷三老袁良碑優賢之寵此皆用今文尙書也

書正義鄭注古文尚書篇與夏侯等同而經字多  
異夏侯等書宅嵎夷爲宅岷鐵昧谷曰柳谷心腹  
腎腸曰憂腎陽剗剗云臆宮剗剗頭庶剗是鄭  
注不同也段氏撰異憂優之誤腎賢之誤陽揚之  
誤錢氏大昕據以訂今盤庚之譌謂今其敷心句  
優賢揚歷句腹卽優之譌腎卽賢之譌腸卽揚之  
譌優賢揚歷卽今之腹腎腸也

漢熹平石經蔡邕所書也洪适隸續載漢石經尚書  
殘碑般庚存者尙一百七十二字與今書多異備

錄於此命

孔本作身

何及相

缺

散

孔作檢言曰人維舊

孔

舊上有

求孔作

舊

下有

有志女母翕侮成人母流

求

下缺

求

舊

下有

有志女母翕侮成人母流

孔

作汝無侮老成

下缺

各共

孔作

爾事齊乃位度爾

乃

口下

民之承保后

旨高

孔作

鮮吹

不浮下試

爾

孔作

遷安定厥國

孔作

今

無

女不

其或迪作

稽

自怨

孔作

怒

永

孔作

勸憂今其有今罔後女何

下

之勞爾

尤

下

于茲

高后

卒乃知

孔作

降開

疾

下能

迪古

我

先后

下

民女有

近

孔作則在乃

心

我先后

緩

下

興降

不

永於

戲

孔作崇降今予

下

缺

缺

缺

缺

缺

缺

缺

缺

絕遺女

孔作分

念以相從各翁

孔作設

中

下缺

建乃

家

殷

孔作盤

既

下缺

眾曰女罔台民

孔作戲

無

勛

孔作

懋

建大命今我

孔作

下缺

凶德綏嘉

孔作

績

下缺

今

孔作

惠

孔作

朕

下缺

相

孔作

動萬民以遷肆上

下缺

乘

孔作

隱

哉予其勛

孔作懋

簡相爾念敬我眾朕不

黃宣猷云任政必自畫井始任政不以井邑郊甸而

田法壤域民不以此閭族黨而此法壤斂財不以

郊甸縣都而賦法壤治兵不以伍兩卒旅而軍法

壤然堯舜禹皆都冀惟殷在河南豫州地最平廣

并法易行盤庚遷殷首以奠居正位者此也前曰  
無歲忘未曰罔弗欽篤敬又綏和之本焉

說命禮記緇衣引作兌命鄭元注傳說作以命高宗  
者蓋說古文省作兌也今書及史記殷本紀並作  
說業桃軒雜綴石氏星經曰傳說者章祝女巫之  
官司天文之內祭祀以祈子孫故有太祝以傳其  
說於神宮鄭氏曰傳說一星惟主後宮女巫禱祠  
求子之事蓋古有保母傳母傳說者謂傳母喜之  
也由石氏則傳爲附達之義而說爲言說之說由

鄭氏則傳爲保傅之傳而說爲喜悅之悅其遂目  
爲商相傳說者始於莊子追蘇子瞻作韓文公廟  
碑記申呂自岳降傳說爲列星於是仍訛襲謬不  
復可正矣兩山墨譚亦引石氏鄭氏之說云商之  
傳說偶與同音諸家不詳其義則曰傳說騎箕尾  
而去又云謂之商相說則於星之所主不相類知  
東坡亦不免於承誤也

高宗亮陰禮記作諒闇鄭康成注讀爲梁鵠漢書五  
行志作涼陰尙書大傳作梁闇鄭注亦云闇讀如



鵲鶴謂盧也呂氏春秋重言篇高宗天子也卽位  
諒闇三年不言卿大夫恐懼患之高宗乃言曰以  
余一人正四方余唯恐言之不類也茲故弗言作  
諫闇與禮記同以余一人已下與今書小異

說築傅巖之野孔傳傅氏之巖在虞虢之界通道所  
經有澗水壞道常使胥靡刑人築護此道說賢而  
隱代胥靡築之以供食史記殷本紀於是乃使百  
工營求之野得說於傅險中是時說爲胥靡築於  
傅險皆不以說身親爲刑人而云代築猶指操作

之役崔駰達旨或以役夫發夢於君王亦因此而  
誤也蔡傳築居也今言所居猶謂之卜築丹鉛總  
錄秦漢以前書籍之文言多譬況當求於意外如  
尙書云說築傳巖之野築之爲言居也後世猶有  
卜築之稱求其說而不得遂謂傳說起於版築雖  
孟子亦誤矣翰案史記正義引地理志云傅險卽  
傳說版築之處所隱之處窟名聖人窟在今陝州  
河北縣北七里卽虞國虢國之界又有傳說祠以  
此證之是傳說版築之處卽傳說所隱之處孟子

謂傳說舉於版築之間猶言起於堵室云爾解書  
之築爲居獨不當孟子之版築爲巖居乎石渠意  
見築之爲言持也謂之卜築者言占卜築牆作舍  
以居之末聞築訓居也以蔡氏之說爲誤看築字  
未免太滯至王嘉拾遺記傳說爲婿衣者春於深  
巖以自給夢乘雲繞日而行筮得利建侯之卦歲  
餘湯以玉帛聘爲阿衡也此又以伊尹事附合於  
傳說且謂說與湯同時其紕謬不待辯而審矣

升鉛總錄武丁嘗居民間已知說之賢矣一旦欲舉

而加之臣民之上人未必貼然以聽也故徵之於  
夢商儉質而信鬼因民之所信而導之是聖人所  
以成務之幾也翰案黃帝以大風吹垢之夢舉風  
后文王以非熊非彫之夢舉太公意皆如此易曰  
神道設教此之謂也

孟子引書曰若藥不瞑眩厥疾不瘳趙岐注書逸書  
也而荀悅申鑒雜言上或問厲志曰若殷高宗能  
葺其德樂瞑眩以瘳疾則實指以爲高宗時書矣  
或荀悅侍講禁中得都古文乎

緇衣引兌命曰爵無及惡德民立而正事純而祭祀  
是爲不敬事煩則亂事神則煩與今書不同而古  
與勝今書黃氏曰抄易曰高宗伐鬼方三年克之  
是爲干戈省躬之戒祖已曰典祀無豐于昵是爲  
黷于祭祀之戒說皆有所預見其言之不虛發也  
史記殷本紀帝武丁祭成湯明日有飛雉登鼎耳而  
响武丁懼祖已曰王無憂先修正事下載祖已乃  
訓于王惟天監下無民字孚命作附命其如古作  
其不何嗚呼下作王嗣敬民罔非天繼常祀母禮

于奔道餘與今書同漢書孔光傳引書惟先假王  
正厥事言異變之來起事有不正也與史記先修  
正事義合馬季長解無豐于昵云昵考也謂禰廟  
也王肅亦云高宗豐于禰案武丁父小乙馬王訓  
禰然則彤曰指祭小乙而言與史記云祭湯者異  
義馬傳古文史記用今文孔光傳夏侯之學亦今  
文也高堂隆云太戊有桑穀生朝武丁有雉雉登  
鼎皆因災恐懼側身脩行故號曰中宗高宗王充  
論衡高宗祭成湯之廟有蜚雉升鼎祖已以爲遠

人將有來者說尙書家謂雉凶議駁不同案書中無遠人將來之語未知所據

兩山墨譚西伯陰行善史遷之謬也孔安國論西伯戡黎而曰文王貌雖事紂內秉王心夫遷之不知文王固也安國號稱儒者乃亦爲是言陋矣案商紂之世武王襲稱西伯胡五峯呂成公陳少南薛季龍金仁山諸儒皆以戡黎爲武王事詳見通鑑前編若武王稱西伯則見呂氏春秋固爲書學者宜知矣案蔡傳西伯文王也後又引或曰西伯武

于也史記嘗載紂使膠鬲觀兵膠鬲問之曰西伯  
曷爲而來則武王亦繼文王爲西伯矣則蔡傳言  
文王者承用孔傳後言武王者兼用胡呂之說也  
說文戈部戠字引商書西伯旣戠黎又邑部邕字引  
商書西伯戠邕案尙書大傳西伯戠耆是戠耆爲  
今文戠邕爲古文作戠黎耆從隸寫參用今文也  
汗簡引尙書龜字作戠似古書又作龜矣史記殷  
本紀及西伯伐飢國滅之徐廣曰飢一作瓠又作  
耆周本紀明年敗耆國徐廣曰一作瓠鄒誕生曰



目耕帖

卷九

三才圖會補

本或作黎案集韻平聲上六脂軌阮飢三字下伊  
帆古天子號亦地名或作阮飢通作者以飢皆與  
省通作飢國者今文三家之異本也

史記殷本紀載祖伊奔告紂曰天既訖我殷命假人  
元龜無敢知吉非先王不相我後人惟王淫虐用  
自絕故天弃我不有安食不虞知天性不迪率典  
今民罔不欲喪曰天曷不降威大命胡不至今王  
其奈何紂曰我生不有命在天乎祖伊反曰紂不  
可諫矣末句是史遷約意言之餘詞皆用今文也

集解引鄭元曰王暴虐於民使不得安食逆亂陰  
陽不度天性傲狠明德不修教法者以暴虐訓淫  
虐亦以今文解古文也

說女女部嫫字引周書大命不嫫又口部哱字引周  
書哱其耆長又辵部退字引周書我興受其退案  
說文於西伯戡黎微子二篇或作商書或作周書  
意或古文合題商周書如唐虞書之例非誤也若  
辵部返字引商書祖甲返案集韻上聲二十五潛  
返字注引說文商書祖伊返伊之爲甲則由後人

傳寫而譌耳

父師少師孔傳父師三公箕子也少師孤卿比干也  
史記作太師少師案家語比干於紂親爲諸父易  
明夷彖曰內難而能正其志箕子以之虞翻注箕  
子紂叔父論語微子去之箕子爲之奴比干諫而  
死馬融注箕子比干皆紂諸父朱子從之服虔杜  
預以箕子紂之庶兄非也微子紂庶兄史記帝乙  
長子曰微子啓啓母賤不得嗣索隱此以啓與紂  
異母而鄭元稱爲同母依呂氏春秋言母當生啓

時猶未正立及生紂始正爲妃故啓大而庶紂小  
而嫡此或以爲同母或以爲異母其爲紂兄無可  
疑者而孟子云以紂爲兄之子且以爲君而有微  
子啓王子比干蓋當日言性之人不改其實因比  
干連及微子公都子亦述人言孟子只重論性亦  
未暇深辯未可執此以疑彼也顧炎武曰知錄古  
有職異而名同者太師少師是也周官所謂孤也  
論語之少師陽則樂官之佐而周禮謂之小師者  
也故史記言紂之將亡其太師疵少師彊抱其樂

器肆周而後儒之傳誤以爲微子也原注云漢書  
古今人表亦有太師疵少師彊又莊子大宗師箕  
子胥餘陸德明釋文引司馬云胥餘箕子名也見  
尸子崔同又云尸子曰箕子胥餘漆身爲厲被髮  
佯狂或云尸子曰比干也胥餘其名

史記宋微子世家載尙書微子只今書五節而文多  
殊異錄於此以備參考史記云乃問於大師少師  
曰殷不有治政不治四方我祖遂陳上紂沈湎於  
酒婦人是用亂敗湯德於下殷既小大好草竊姦

完卿士師師非度皆有罪辜乃無維獲小民乃並  
與相爲敵讎今殷其典喪若涉水無津涯殷遂喪  
越至於今日大師少師我其發出往吾家保於喪  
今汝無故告予顛躋如之何其大師若曰王子天  
篤下菑亡殷國乃毋畏長不用老長今殷民乃陋  
淫神祇之祀今誠爲治國之治身死不恨爲死終  
不得治不如去今誠已下史遷約義言之餘並用  
今文也

我用沈酗于酒釋文以酒爲凶曰酗說文作醕云醕

晉薛嘉穎書經書華泰書曰婦牧書曰婦言紂之  
亡也以色荒微子曰沈酗箕子曰沈酗紂之亡也  
以酒禍

說文心部懷字引商書以相陵懷似今書相爲敵讎  
之異文非佚書也

我其發出狂鄭元本作出往與史記同注云我其起  
作出往也較狂字義長

用又讎斂釋文讎鄭音疇馬本作耦云數也斂力檢  
力馬鄭力監反謂賦斂也自靖馬本作清謂絮也

皆參川今文

論衡本性篇引微子曰我舊云孩子王子不言紂  
爲孩子之時微子睹其不善之性性惡不出衆庶  
長大爲亂不變故云也案釋文刻音克馬云侵刻  
也季長用古文說王充所引知今文尙書刻作孩  
其說如此也